

ODLUKA

**O PRIHVATANJU ZADUŽENJA PO SPORAZUMU O ZAJMU IZMEĐU
BOSNE I HERCEGOVINE I OPEC FONDA ZA MEĐUNARODNI
RAZVOJ (OFID) ZA REALIZACIJU PROJEKTA KORIDOR Vc**

Sarajevo, juli 2014. godine

Na osnovu člana 40. stav 5. Zakona o dugu, zaduživanju i garancijama u Federaciji Bosne i Hercegovine ("Službene novine Federacije BiH", br. 86/07, 24/09 i 44/10) Predstavnički dom Parlamenta Federacije Bosne i Hercegovine na svojoj _____ sjednici održanoj _____ godine i Dom naroda Parlamenta Federacije Bosne i Hercegovine na svojoj _____ sjednici održanoj _____ godine d o n o s i

ODLUKU

O PRIHVATANJU ZADUŽENJA PO SPORAZUMU O ZAJMU IZMEĐU BOSNE I HERCEGOVINE I OPEC FONDA ZA MEĐUNARODNI RAZVOJ (OFID) ZA REALIZACIJU PROJEKTA KORIDOR Vc

I.

Prihvata se zaduženje Federacije Bosne i Hercegovine (u daljem tekstu: Federacija), po Sporazumu o zajmu (u daljem tekstu: Sporazum) između Bosne i Hercegovine i OPEC Fonda za međunarodni razvoj (OFID), u iznosu od 24.000.000,00 EUR-a za realizaciju Projekta Koridor Vc.

II.

Sredstva Sporazuma iz tačke I. ove Odluke koristit će se za finansiranje Projekta Koridor Vc na dionici Drivuša – Donja Gračanica za poddionicu Klopče-Donja Gračanica.

Svrha Projekta je podrška razvoju mreže autocesta u BiH, a ova kreditna sredstva namijenjena su za nastavak izgradnje prioriternih dionica na Koridoru Vc.

III.

Sredstva Sporazuma iz tačke I. ove Odluke, odobravaju se Federaciji pod sljedećim uslovima:

- rok otplate.....18 godina
- grace period:.....4 godine
- kamatna stopa:.....4,5 %
- dospijeća:.....polugodišnje, u jednakim otplatama glavnice
- datumi plaćanja glavnice i kamata:..... 15. februar i 15. august svake godine
- iz kreditnih sredstava ne mogu se plaćati carine, porezi i druge dažbine

IV.

Potvrđuje se da je razmatrana dokumentacija prihvatljiva za Federaciju, a posebno:

- Sporazum o zajmu između Bosne i Hercegovine i OPEC Fonda za međunarodni razvoj (OFID)
- Projektni sporazum između Federacije BiH i OPEC Fonda za međunarodni razvoj (OFID)
- Nacrt supsidijarnog sporazuma o zajmu i projektu između BiH i Federacije BiH;

V.

Sredstva zajma iz tačke I. ove Odluke Federacija će na kreditnom osnovu prenijeti na JP "Autoceste Federacije BiH" d.o.o Mostar, koje je krajnji korisnik i dužnik po zajmu.

U periodu implementacije Projekta, u budžetu Federacije nije potrebno osigurati finansijska sredstva za dodatno sufinansiranje Projekta.

VI.

Zadužuje se Federalno ministarstvo finansija-Federalno ministarstvo financija da sa JP "Autoceste Federacije BiH" d.o.o Mostar usaglasi i sklopi odgovarajući Podugovor o zajmu kojim će se u svrhu redovne otplate, definirati uslovi vraćanja sredstava koja se prenose na kreditnom osnovu.

VII.

Daje se saglasnost za zaključivanje Supsidijarnog sporazuma između BiH i Federacije, Podugovora o zajmu između Federacije i JP "Autoceste Federacije BiH" d.o.o Mostar za sredstva iz tačke I. ove Odluke.

Za potpisivanje Supsidijarnog sporazuma i Podugovora o zajmu, ovlašćuje se federalni ministar finansija - federalni ministar financija.

VIII.

Za realizaciju ove Odluke i izvještavanje zadužuju se Federalno ministarstvo finansija - Federalno ministarstvo financija, Federalno ministarstvo prometa i komunikacija i JP "Autoceste Federacije BiH" d.o.o Mostar, svako u okviru svoje nadležnosti.

IX.

Implementacija Sporazuma iz tačke I. ove Odluke, ne zahtijeva donošenje novih ili izmjenu postojećih zakona.

X.

Ova Odluka stupa na snagu narednog dana od dana objavljivanja u "Službenim novinama Federacije BiH".

OBRAZLOŽENJE

Pravni osnov

Pravni osnov za donošenje ove Odluke sadržan je u članu 40. stav 4. Zakona o dugu, zaduživanju i garancijama u Federaciji Bosne i Hercegovine ("Službene novine Federacije BiH", br: 86/07, 24/09 i 44/10), koji propisuje pitanja vanjskog zaduženja Federacije i procedure za zajmove. Izmjenom Zakona o dugu, zaduživanju i garancijama u Federaciji Bosne i Hercegovine („Službene novine Federacije BiH“, broj: 44/10) u članu 40. stav 5. predviđeno je da Vlada Federacije Bosne i Hercegovine nakon prihvatanja Nacrta sporazuma o zajmu i utvrđivanja Prijedloga odluke, istu dostavlja Parlamentu Federacije BiH na usvajanje.

Razlozi za donošenje

Svrha Projekta je podrška razvoju mreže autocesta u BiH, a ova kreditna sredstva namijenjena su za nastavak izgradnje prioritetnih dionica na Koridoru Vc. Za navedenu poddionicu završen je glavni projekt i izvršena je revizija glavnog projekta. U toku je proces eksproprijacije zemljišta i pribavljanja građevinske dozvole. Poddionicu Klopče-Donja Gračanica ukupne dužine 6,32 kilometra, pored otvorene trase karakteriše prisustvo jednog vijadukta, dok je za drugu polovinu karakteristično da otvorene trase praktično i nema, već je sastavljena naizmjenično od tri vijadukta i dva brdska tunela. Na ovoj poddionici je predviđena i izgradnja odmorišta sa rekreacijskim površinama za oba pravca autoceste, koje je locirano na panoramski atraktivnoj lokaciji sa zelenim površinama.

Realizacijom ovog Projekta značajno bi se smanjilo vrijeme putovanja i s tim u vezi značajno bi se doprinijelo uravnoteženom ekonomskom razvoju u regionu, poboljšao bi se potencijal za privredni razvoj što bi za posljedicu imalo povećanu udobnost i brzinu dnevne migracije stanovništva među glavnim gradovima.

Obrazloženje pojedinih tačaka

Tačka I. je nužna kako bi se prihvatilo zaduženje Bosne i Hercegovine kod OPEC Fonda za međunarodni razvoj (OFID)

Tačkom II. potvrđuje se namjena utroška sredstava Sporazuma.

Tačkom III. precizirani su uslovi Sporazuma.

Tačkom IV. potvrđuje se da je dokumentacija parafirana tokom pregovora s OPEC Fondom za međunarodni razvoj (OFID) prihvatljiva za Federaciju BiH, što je uslov da Bosna i Hercegovina i OPEC Fond za međunarodni razvoj (OFID) pristupe potpisivanju Sporazuma o finansiranju.

Tačkom V. se definira način implementacije Projekta, te da nije potrebno osigurati dodatna sredstva u Budžetu Federacije za ovu namjenu.

Tačkom VI. se definira obaveza Federalnog ministarstva finansija-Federalnog ministarstva financija da s JP "Autoceste Federacije BiH" d.o.o Mostar usaglasi i sklopi odgovarajući Podugovor o zajmu.

Tačkom VII. daje se saglasnost za zaključivanje Supsidijarnog sporazuma o zajmu s Bosnom i Hercegovinom, Podugovora o zajmu između Federacije s JP "Autoceste Federacije BiH" d.o.o Mostar i ovlaštenje federalnom ministru finansija - federalnom ministru financija da u ime Federacije potpiše iste.

Tačkom VIII. se za realizaciju ove Odluke zadužuje Federalno ministarstvo finansija - Federalno ministarstvo financija, Federalno ministarstvo prometa i komunikacija i JP "Autoceste Federacije BiH" d.o.o Mostar.

Tačka IX. potvrđuje da za implementaciju Sporazuma o finansiranju nije potrebno donijeti nove ili izmijeniti postojeće zakone.

Tačka X. propisuje stupanje na snagu ove Odluke.